

平園續稿卷第十三

廬陵周益國文忠公集五十三

同邑裔孫遵燭重校刊

序

陸子履嵩山集序

本朝文章至慶厯而盛歐陽文忠公實主夏盟學者一被品題
往往名世當是時陸公子履乃與文忠周旋館閣詩文往復相
與至厚其人抑可知已惜乎仕宦不偶陷於朋黨起而復仆仆
而復起晚遇裕陵自集賢修撰守河中召知審官東西院方嚮
於用則已老矣君子每有不遇之歎焉今其曾孫知齋於公既
沒百年之後兵火搶攘之餘冥搜博求僅得遺文十有二卷屬

予爲序將刻而傳之予嘗歎尹師魯蘇子美江隣幾梅聖俞丁
元珍皆著美名負屈稱與子履大畧相似彼五賢者得文忠銘
其藏序其文姓名鏗轟炳耀至今盪人耳目獨公以後死不得
與於斯文或者遂謂公生旣不遇其沒又重不幸也予曰不然
公當古文復興時文忠實與爲友其出倅宿州送以詩曰子履
自幼聲名馳落筆文章天下知開懷吐胃不自疑世路迫窄多
弄機鬢毛零落風霜摧十年江湖千首詩又曰一自蘇梅閉九
泉始聞東顧播新篇暮年酬唱尤多有怕逢詩敵力難當及敢
期佳句報琅玕之句是則公之生也已爲文忠所稱道如此尙
何待於身後其垂名不朽亦豈下於五賢哉予故表而出之公

諱經子履其字洛陽人故以嵩山老人名其集慶元五年二月一日少傅觀文殿大學士致仕益國公周某序

趙訓之忠節錄序

功烈有大小死節無輕重惟能捐軀殉國則求仁得仁豈必論其功何如哉國家自靖康後金賊蹂踐中原羣盜潰兵所在破城屠邑守官者奉頭鼠竄之不暇於此有人焉視死如歸其爲節也重矣當建炎三年歲己酉十一月隆祐太后自洪上贛護衛諸軍道有叛者既犯吉之永豐皇族訓之字誨道以承議郎實爲縣宰率弓兵拒戰力不敵遇害明年有司以聞特贈直秘

閣仍官二子有女歸太和蕭氏奉其喪葬於廬源

翰苑本作廬原

今七

十年松檟鬱然女尙無恙其孫江州別駕彥櫛捧檄來拜墓下
旣哀制詞史傳又以宗人吉州推官子琇所著行狀及諸公記
跋共爲一卷命曰忠節錄屬予爲序予嘗觀書太史氏是歲有
直龍圖閣令晟守黃州城陷罵虜而死初贈右文殿修撰再贈
徽猷閣待制隆興改元張忠獻公宣撫兩淮復用父老之言奏
乞立廟遂賜忠顯之額今永豐纔以君像附城隍祠殆闕典也
按子琇及與君聯事而行狀成於四年其書隆祐南幸併君之
死皆差一歲惟永豐志題名載君以二年至縣者是也其死在
三年冬而敘君本末反云四年莅官則又誤矣夫當日之行狀
邑人之紀次尙或訛舛况傳疑於後世乎雖然此不足辨也所

以詳言之者使士大夫知同時宗室爲守爲令死職如此於以彰祖宗涵養作成之效豈特慰其子孫而已慶元己未四月日

臨江軍三孔文集序

行有餘力則以學文聖人之言萬世是程或疑文行忠信之序是不然四科有先後四教非先後特因其材而進德焉繪事後素不容紊也本朝人物至元祐而盛其兄弟傑然則有臨江之孔氏曰文仲字經父曰武仲字常父曰平仲字毅父先聖四十八代孫也居家孝悌行己謹信蒞官敬事上忠其行美矣冠禮部冠國學登高第應制舉經父自諫垣入詞掖常厯師儒掌內外制毅父尤精史學更踐中外天下共稱其文號曰三孔今纔

百餘年而集橐散逸罕傳誠故郡之闕典也慶元四年太守濡

須王達

別本作邁

實來政修教明瞻喬木而慕先賢既奠謁其像於

學宮又博訪遺文而刻之雖曰存一二於千百然讀之者知爲
有德之言而非雕篆之習也總成若干卷屬某以序昔太史黃
魯直頌當時之人才有曰二蘇聯璧三孔分鼎張丞相天覺在
元符中詆元祐詞臣極其荒唐謂兩蘇爲狂率則剛直也謂公
兄弟爲濶踈則高古也夫魯直於蘇氏分兼師友天覺於眉山
心伏其能皆以公兄弟配之文行何如哉若其出處載國史傳
雅具別著此不備書五年四月甲戌具位周某序

孫尙書鴻慶集序

大凡文人才士少之時屈首受書未能多聞天下之義理壯則從事四方志有所分及其老也血氣既衰聰明隨之雖有著述鮮克名家此古今之通患也其或軼羣邁往賦才獨異而復天假之年磨淬鍛鍊重之以湖山之助名章雋語少而成壯而盈晚而愈精有若戶部尙書晉陵孫公葢千萬人中時一遇焉公生於元豐辛酉當大觀政和間士惟王氏三經義字說是習而公博學篤志如韓退之謂禮部所試可無學而能者第進士冠詞科筆勢翩翩高出流輩將及知命靖康俶擾而執法爲詞臣旋由鎖闥歷吏戶長貳連守大邦其章疏制誥表奏往往如陸敬輿明辯駿發每一篇出世爭傳誦紹興而後遭口語斥居象

郡久之歸隱太湖上捨蜚蠻而狎鷗鷺去茅葦而友松菊於是
繙北堂萬卷之鈔袖明光起草之手默觀物化吟咏情性烟波
萬頃納之胷次風雲變態日接於前如是二紀所得不可勝計
毋怪乎筆端之滾滾也天門劃開訴章上達論撰次對璽書繼
下年雖耄老親爲謝表至於宰執侍從臺諫則人致一啟各出
新意其用事屬辭少壯所不逮又後十載當孝宗朝嘗命編類
蔡京王黼等事實上之史官此與伏生年九十餘詔太常往受
尙書何異是豈可以他人老少常理論也哉沒旣一世其子興
國太守介宗以書謂某曰先君文橐中更兵燼存者無幾而閩
蜀所刻復雜翟忠惠之文大懼不足傳信今定爲四十二卷其

未備者方哀次外集爲我序之憶乾道丁亥遇公陽羨公八十
有七矣論文之餘語及前朝舊事健論滔滔如洪河東注緒言
纒纒如聚蠶繅絲屢更僕不能休然後知公非特文鋒不可當
而老如趙充國猶善爲兵也茲幸挂名集端因具列之近歲吏
部侍郎葛公立方作韻語陽秋載東坡自海南歸公方髭鬣坡
命對衡門穉子璠璣器公應聲曰翰苑仙人錦繡腸坡歎曰真
璠璣也以公早慧固應有此然坡北歸實靖國辛巳公已二十
一得非元豐乙丑自便還常公纔五歲時乎所記訛耳鄉人戶
傳亦不得而畧也公諱覲字仲益嘗以龍圖閣學士提舉南京
鴻慶宮故自號鴻慶居士云慶元五年十一月某日少傅觀文

殿大學士致仕益國公周某序

初寮先生前後集序

一代文章必有宗惟名世者得其傳天生斯人固已不數向非君師作而成之則其道不墜於地者幾希若稽本朝太祖以神武基王業文治興斯文一傳爲太宗翰林王公元之出焉再傳爲真宗楊文公大年出焉長養尊用風示學者雖間以剛直被排斥而眷顧終不少衰至於仁宗英宗神宗然後異才充滿中外其傑出如歐陽文忠公又逢時得政同心德於三朝閱八年之久相與化灰天下功不少矣故其門人高弟尤多惟東坡蘇公崛起西蜀嘉祐收以異科治平欲躡箕翰苑熙寧首待以國

士及遇哲宗遂光顯於朝中間小人敲撼挫捩欲殺不果者天
意也上賜也晚守中山尙書左丞王公世家是邦博學工文詞
年十六卽貢京師後二年坡至奇之公亦自謂得師也明年坡
南遷不能卒業公尋登第闢初寮於精舍日夜讀書著文年二
十有七游五臺爲竹林泉賦以將相喻泉石格高而意新送某
曾大父詩云不論與汝小一月政自容君數百人專用吾宗公
瑾伯仁事致推尊年德之意精切渾成不類少作時方諱言蘇
學而公已潛啟其秘鑰久之徽宗旁求文士召寘館閣給札親
試驟掌書命由中司入北門歷二轄其詔制表章詩文大率雅
重溫潤而時發秀傑之語定功繼伐等碑睿謨曲宴百韻詩多

出特命上恩與天通矣萬目睽睽徒謂其鶴鳴九皐而不知奪
胎換骨自有仙手故未嘗以曲學指之今前集四十卷是也中
興南渡四海名勝遷謫避亂萃於湖廣而公壻趙竒子辟章又
家之游夏大篇短章更唱迭和旣已盡發平昔之所蘊且復躬
閱事物之變益以江山之助心與境會意隨辭達韻遇險而反
夷事積故而逾新他人瞠乎其後我乃綽有餘裕至於桂柳佛
寺諸記閎深辨麗近坡暮年之作黃張晁秦旣沒系文統接墜
緒誰出公右豈止襲其裳佩其環而已今後集十卷是也初公
與先大父同爲元符庚辰進士政和中公典貢舉擢先公第二
故公季子承議郎辟綱及公孫刑部侍郎秬曾孫今豈守宗孟

繼以集序爲請久負諾責夫豈無說蓋公內制十八卷外制八卷李文敏公漢老實題其首且謂公天才英邁筆力有餘於文於詩瓌奇高妙無所不能用是序公全書所謂一言以蔽之者某尙何所伸其喙若夫本天人之相因考源流之所自以申叙累世之契好而告諸來者則不敢辭也公諱安中字履道享年若干後學尊之曰初寮先生故以名集慶元六年二月日

續後漢書序

曹氏代漢名禪實篡特新莽之流亞丕方登壇自形舜禹之言固不敢欺其心矣今已千載好惡豈復相沿而蘇軾記王彭之說以爲塗巷談三國時事兒童聽者聞劉敗則輦蹙曹敗則稱

快遂謂君子小人之澤百世不斬茲豈人力強致也歟陳壽身
爲蜀人徒以仕屢見黜父又爲諸葛亮所髡於劉氏君臣不能
無憾著三國志以魏爲帝而指漢爲蜀與孫氏俱謂之主設心
已偏故凡當時祿祭高帝以下昭穆制度皆畧而勿書方且乞
米於人欲爲佳傳私意如此史筆可知矣其死未幾習鑿齒作
漢晉春秋起漢光武終晉愍帝以蜀爲正魏爲篡謂漢亡僅一
二年則已爲晉炎興之名天實命之是蓋公論也然五十四卷
徒見於唐藝文志及本朝太平御覽之目逮仁宗時修崇文總
目其書已逸或謂世亦有之而未之見也幸晉史載所著論千
三百餘言大旨昭然劉知幾史通云備王道則曹逆而劉順本

朝歐陽修論正統而不黜魏其賓客章望之著明統論非之見於國史近世張栻經世紀年直以先主上繼獻帝爲漢而附魏吳於下方皆是物也今廬陵貢士蕭常潛心史學謂古以班固史爲漢書范曄史爲後漢書乃起昭烈章武元年辛丑盡少帝炎興元年癸未爲續後漢書旣正其名復擇注文之善者併書之積勤二十年成帝紀年表各二卷列傳十八卷吳載記十一卷魏載記九卷別爲音義四卷惜乎壽疏畧於前使常不得追記英賢憲章於後以釋裴松之之遺恨也昔周東遷浸以微弱至春秋時僅存王城而吳楚強大綿地數千里皆僭稱王聖人斷然以夷狄予之昭烈土地兵甲甚非周比興於漢中適與沛

公始封國號同天時人事決非偶然孔子復生必有以處此乃爲首探魏文當日之心次舉蘇氏百世之說以合習氏之論而證舊志之非作續後漢書序慶元六年庚申二月望

高端叔變離騷序

詩國風及秦不及楚已而屈原離騷出焉衍風雅於詩亡之後發乎情主乎忠直殆先王之遺澤也謂之文章之祖宜矣厥後宋玉之九辯王褒之九懷劉向之九歌王逸之九思曹植之九愁九咏陸雲之九愍皆九章九歌之苗裔自揚雄至劉勰則或反或廣或爲之辨祖述摹倣不可勝數迄今本朝晁太史補之始重編楚辭十六卷續楚詞二十卷又上起荀卿下逮王令集